



A-N-T-I **ALIANSI NASIONÁL TIMOR LESTE BA TRIBUNÁL INTERNASIONÁL**

Tel: +670 77179655 / 77432621/77402231

AMI KONTRA IMPUNIDADE HAOSRU EIS JENERAL WIRANTO

Introdusaun

Fenomena polítika réal ne'ebé lao namanas iha Indonezia liu-liu relasiona ho Prezidente Jokowi nia desizaun hodi nomea eis Jeneral Wiranto atu asume kargu nu'udar Ministru Kordenador Politiku, Justisa no Seguransa (*Mentri Koordinator Politik, Hukum dan Keamanan-MENKOPOLHUKAM*) iha estrutura governasaun foun Jokowi nian, halo ami laran taridu no ofende teb-tebes ami-nia sentimentu justisa no sentimentu umanu. Desizaun ne'e halo ami hanoin hikas fali esperensia moruk ba situasaun pasadu iha tinan 1999 molok, durante no depois refremdum iha Timor-Leste ne'ebé rezulta kuaze ema sivíl hamutuk rihun atus rua resin (200.000) mak hetan torturasaun, violasaun seksuál, muda ema forsadamente, halakoon forsadu no mate.

Aktu hirak ne'e kontra prinsipiu no valores direitus umanus fundamental tuir Lei Umanitaria Internasional, tanba konsidera nu'udar krime kontra umanidade.

Liu tiha dekada ida ona, vítima no familia vítima iha Timor-Leste konsistentemente insisti lia-los no justisa ba Estadu Indonezia, Estadu Timor-Leste, partikularmente Membro Konsellu Seguransa ONU, no comunidade internasional.

Faktus Involvimentu Eis-Jeneral Wiranto iha tinan 1999

Iha tinan 1999: Wiranto nu'udar Komandante Supremu TNI ne'ebé iha kompetensia no póder hodi garante seguransa no estabilidade ba prosesu durante no depois Konsulta Popular tuir akordu 5 de Maiu 1999 ne'ebé asina husi Ministru Negosiu Estranjeiru Indonezia, Portugal no Sekretariu Jéral Nasoins Unidas.

Eis Jeneral Wiranto hanesan Komandante Supermu Militar Indonezia nian ne'ebé responsabiliza ba violasaun, deportasaun no persekusaun ne'ebé halo ho eskalaun boot no sistematiku hodi rezulta ema 280 maka mate no obriga ema kuaze 200.000 mak halai ba Indonezia-Nusa Tenggara Timur (NTT), inklui estragus sasan no riku soin ema timor oan nian.

Prosesu Akuzasaun ba Eis Jeneral Wiranto

Iha Marsu 2003 Unidade Krime Sériu (SCU) hasai karta akuzasaun hasoru Eis-Jeneral Wiranto Cs.

Unidade ne'e mos husu ba Tribunál Distrital Dili atu hasai karta mandadu kapturasaun. Aliende ne'e iha 19 Marsu 2004 Adjuntu Prokurador ba Krime Sériu mós hasai karta ida hodi apoiu atu bele hasai karta mandadu kapturasaun hasoru Jeneral WIRANTO relasiona ho faktus sira ne'ebé hatudu indikasaun forte katak Jeneral WIRANTO komete violasaun direitus umanus no krime kontra umanidade iha Timor- Leste.

Maske nune'e too ohin loron, WIRANTO sei nafatin goza nia privileizu hodi moris livre husi prosesu akuntabilidade ba justisa ida ne'ebé justu no kredivel. Pior liutan mak Wiranto ho estatuto nu'udar "akuzadu" maibe nafatin kontinua hetan konfiansa husi Prezidente Joko Widodo.

Ho faktus hirak ne'ebé temi iha leten, Aliansi Nasional Timor-Leste ba Tribunál Internasional (ANTI) Ezije:

1. Apela ba Estadu Indonezia atu imediatamente retira naran akuzadu Wiranto husi estrutura Governasaun Joko Widodo no husu a Estadu Indonezia no Timor-Leste atu hakotu korenti impunidade nune'e hamosu sosiadade ne'ebé respeita ba valores direitus umanus no hametin Estadu Direitu Demokratiku.
2. Ba Konsellu Seguransa ONU, atu mantein no konsisten ba desizaun kontra impunidade bazeia ba akuzasaun husi Painel Espesial ba Krime Grave iha tinan 2003 no buka mekanismu efetivu hodi asegura akuntabilidade ne'ebé kredivel husi autór kriminozu sira partikularmente akuzadu eis Jeneral Wiranto
3. Ba comunidade internacional, atu ezije Prezidente Jokowi hodi iha seriadade atu labele inklui autór kriminozu sira iha estrutura governasaun nune'e bele hametin liutan prosesu demokrasia no direitus umanus iha Indonesia; no
4. Apela ba estadu no membru comunidade internacional sira nia responsabilidade moral atu halo kapturasaun ba akuzadu eis Jeneral WIRANTO bainhira deit no iha ne'ebé deit, wainhira WIRANTO halo vizita oficial ruma, kuandu Prezidente Jokowi la-rekonsidera atu retira Wiranto hosi pozisaun ne'e.

Julga kriminozu hodi hametin rekonsiliaun ne'ebé permanente.

Abaixo Akuzadu Wiranto.

Viva Lia Los no Justisa.

A luta continua!

Dili, 29 Jullu 2016

Membru:

JSMP, HAK, La'o Hamutuk, ACbit, Asosiasaun Vitima, KSI, Front Mahasiswa Timor-Leste, MDI, Sek. Fongtil, Fokupers, AJAR-TL.